

Na osnovu člana 6. i 8. Zakona o komunalnim djelatnostima ("Službene novine TK", broj: 11/05 i 7/07), i člana 24. Statuta općine Srebrenik ("Sl. glasnik općine Srebrenik", broj: 01/08), Općinsko vijeće Općine Srebrenik na sjednici održanoj dana 08.12. 2011. godine, d o n o s i :

## **ODLUKU**

o komunalnim djelatnostima

### **I- OPĆE ODREDBE**

#### **Član 1.**

Odlukom o komunalnim djelatnostima (u daljem tekstu Odluka), određuju se komunalne djelatnosti na području općine Srebrenik i način obezbjeđenja obavljanja komunalnih djelatnosti, uslovi za obavljanje komunalnih djelatnosti, način finansiranja komunalnih djelatnosti, utvrđivanje visine komunalne naknade i nadzor nad izvršenjem ove odluke.

### **II - KOMUNALNE DJELATNOSTI**

#### **Član 2.**

U smislu ove odluke, na području općine Srebrenik obavljaju se sljedeće komunalne djelatnosti:

1. Snabdijevanje pitkom vodom;
2. Odvođenje i prečišćavanje otpadnih voda;
3. Snabdijevanje toplotnom energijom;
4. Odlaganje komunalnog otpada;
5. Obavljanje javnog prevoza putnika;
6. Obavljanje dimnjačarskih poslova;
7. Obavljanje pogrebnih poslova;
8. Održavanje mezarja - grobalja;
9. Tržnice i pijace;
10. Održavanje javnih parking prostora i javnih garaža;
11. Održavanje čistoće;
12. Održavanje javnih površina;
13. Održavanje javne rasvjete;
14. Obavljanje kafilerijskih poslova;
15. Dekorisanje.

Djelatnosti iz tačaka 11. - 15. su djelatnosti zajedničke komunalne potrošnje.

### **III - NAČIN OBAVLJANJA KOMUNALNIH DJELATNOSTI**

#### **Član 3.**

Općina Srebrenik obezbjeđuje obavljanje komunalnih djelatnosti putem:

- a) javnih preduzeća za obavljanje komunalnih djelatnosti,
- b) pravnog ili fizičkog lica na osnovu ugovora o povjeravanju komunalnih poslova,
- c) pravnog lica na osnovu ugovora o koncesiji, u skladu sa Zakonom o koncesijama,
- d) mjesnih zajednica, na njihov prijedlog a na osnovu odluke Općinskog vijeća,
- e) pravnih lica čiji su osnivači vjerske zajednice i crkve, na njihov prijedlog a na osnovu odluke Općinskog vijeća.

#### Član 4.

(Komunalne djelatnosti koje se povjeravaju javnim preduzećima za obavljanje komunalnih djelatnosti)

1. Općina Srebrenik povjerava JP Vodovod i kanalizacija "SREBRENİK" d.d. Srebrenik obavljanje sljedećih komunalnih djelatnosti:

- a) **snabdijevanje pitkom vodom**, što podrazumijeva zahvatanje, prečišćavanje, kontrolu kvaliteta i distribuciju vode za piće vodovodnom mrežom do mjernog instrumenta korisnika, uključujući i mjerni instrument, odnosno zajednički mjerni instrument kod kolektivnog stanovanja, kao i održavanje hidranata;
- b) **odvođenje i prečišćavanje otpadnih voda**, što podrazumijeva poslove sakupljanja, odvođenja i prečišćavanja otpadnih voda od priključka korisnika na zajedničku kanalizacionu mrežu, odnosno od prvog kontrolnog okna, tretman otpadnih voda u uređaju za prečišćavanje, crpljenje, odvoz i zbrinjavanje fekalija iz septičkih jama, te odvođenje atmosferskih voda.

2. Općina Srebrenik povjerava JP "9. Septembar" d.d. Srebrenik obavljanje sljedećih komunalnih djelatnosti:

- a) **održavanje čistoće**, u dijelu koji se odnosi na sakupljanje i odvoz komunalnog otpada od individualnih korisnika na uređene pretovarne stanice ili sanitarnu deponiju;
- b) **odlaganje komunalnog otpada**, što podrazumijeva obrađivanje i trajno odlaganje komunalnog otpada na sanitarnu deponiju, otvaranje, saniranje i zatvaranje deponije po posebnim propisima;
- c) **održavanje javnih parking prostora**, što podrazumijeva održavanje prostora i objekata u kojima se pružaju usluge parkiranja motornih vozila;
- d) **tržnice i pijace**, podrazumijevaju određeni zatvoreni i otvoreni prostor na kojima se pružaju usluge obavljanja prometa živežnim namirnicama i drugim proizvodima, te uređivanje i održavanje ovih prostora;
- e) **održavanje čistoće**, u dijelu koji se odnosi na čišćenje i pranje javnih površina, uklanjanje snijega i poledice sa javnih površina;
- f) **održavanje javnih površina**, što podrazumijeva održavanje javnih prometnih površina, pješačkih staza i pješačkih zona van zelenih površina, trgova i otvorenih odvodnih kanala, javnih zelenih površina (pješačkih staza i pješačkih zona unutar zelenih površina), hortikultura, urbanog mobilijara (javnih satova, javnih česmi, fontana i javnih nužnika), spomen parkova, dječjih igrališta, parkovskog mobilijara, žardinjera, rekreativno-zabavnog centra i zoo-vrtova;
- g) **obavljanje kafilerijskih poslova**, što podrazumijeva uklanjanje pasa lualica, eutanaziju i neškodljivo uklanjanje životinjskih leševa sa javnih površina;
- h) **dekorisanje**, što podrazumijeva ukrašavanje javnih površina i prostora prigodnim ukrasnim rekvizitima a povodom državnih i vjerskih praznika, kulturnih, zabavnih, sportskih, sajamskih i drugih manifestacija.

#### Član 5.

Općina Srebrenik će pravnim ili fizičkim licima na osnovu pisanog ugovora o povjeravanju komunalnih poslova, povjeriti sljedeće komunalne djelatnosti:

- **održavanje javne rasvjete**, što podrazumijeva održavanje objekata i uređaja javne rasvjete kojom se osvijetljavaju prometne i druge javne površine;

#### Član 6.

Postupak za dodjelu komunalnih djelatnosti iz člana 5. ove odluke provodi Općinska komisija za javne nabavke, u skladu sa Zakonom o javnim nabavkama i Zakonom o komunalnim djelatnostima, a na osnovu Programa zajedničke komunalne potrošnje i drugih programa koje donosi općinsko vijeće.

Programom zajedničke komunalne potrošnje detaljno se utvrđuje obim i vrsta usluga komunalnih djelatnosti zajedničke komunalne potrošnje.

Program sačinjava općinska služba nadležna za komunalne poslove a donosi Općinsko vijeće, najkasnije do kraja oktobra tekuće za narednu godinu.

Nakon provedene procedure, te dostavljenog izvještaja Komisije po istom, Općinsko vijeće donosi Odluku o izboru lica kome će se povjeriti obavljanje komunalnih poslova na osnovu ugovora.

Na osnovu Odluke iz prethodnog stava, Općinski načelnik sklapa ugovor o povjeravanju određenih komunalnih poslova, koji obavezno sadrži: djelatnost za koju se sklapa ugovor, vrijeme na koje se sklapa ugovor, vrstu i obim poslova, način određivanja cijene za obavljanje poslova te način i rok plaćanja, kao i garanciju izvršioca za ispunjenje ugovora.

### Član 7.

Općina Srebrenik će obavljanje komunalne djelatnosti **snabdijevanja pitkom vodom** povjeriti i Mjesnim zajednicama koje posjeduju samostalne vodovodne sisteme i koje ispunjavaju zakonske i podzakonske uslove za to.

Odluku o povjeravanju obavljanja djelatnosti iz stava 1. ovog člana, donosi Općinsko vijeće na prijedlog zainteresovane Mjesne zajednice.

### Član 8.

Općina Srebrenik će JP "9. Septembar" d.d. Srebrenik, te pravnim licima čiji su osnivači vjerske zajednice i crkve, a koji ispunjavaju zakonske uslove za obavljanje komunalnih djelatnosti, povjeriti obavljanje sljedećih komunalnih djelatnosti:

- a) **obavljanje pogrebnih poslova**, što podrazumijeva preuzimanje, opremanje i prijevoz umrlih lica do mezarja-groblja;
- b) **održavanje mezarja-grobalja**, što podrazumijeva upravljanje, održavanje i uređivanje prostora i objekata (mtrvačnice, kapele i sl.) za obavljanje ispraćaja i sahrane umrlih lica.

Općina Srebrenik će obavljanje komunalne djelatnosti **održavanje mezarja-grobalja** povjeriti i Mjesnim zajednicama koje ispunjavaju zakonske i podzakonske uslove za to.

Odluku o povjeravanju obavljanja djelatnosti iz stava 1. i 2. ovog člana, donosi Općinsko vijeće na prijedlog zainteresovanog lica.

### Član 9.

Općina Srebrenik povjerava JP "9. Septembar" d.d. Srebrenik obavljanje komunalne djelatnosti **snabdijevanja toplotnom energijom**, što podrazumijeva poslove proizvodnje i distribucije toplotne energije (pare, vrele vode, tople vode, sanitarne tople vode i sl.) mrežom do podstanice korisnika, uključujući i podstanicu, odnosno glavni zaporni ventil ili zajednički mjerni instrument kod objekta kolektivnog stanovanja, odnosno mjerni instrument korisnika.

Obavljanje komunalne djelatnosti **snabdijevanja toplotnom energijom** Općina Srebrenik može povjeriti i drugom pravnom licu na osnovu ugovora o koncesiji.

Postupak za dodjelu komunalne djelatnosti iz prethodnog stava vršit će se na osnovu Zakona o koncesijama i Zakona o komunalnim djelatnostima.

### Član 10.

Općina Srebrenik će pravnim ili fizičkim licima na osnovu pisanog ugovora o povjeravanju komunalnih poslova povjeriti obavljanje sljedećih komunalnih djelatnosti:

- a) **obavljanje javnog prevoza putnika**, što podrazumijeva prevoz putnika u javnim prevoznim sredstvima na linijama unutar općine Srebrenik;
- b) **obavljanje dimnjačarskih poslova**, što podrazumijeva provjeravanje ispravnosti i funkcionalnosti dimovodnih kanala i uređaja za loženje;

- c) **tržnice i pijace**, podrazumijevaju određeni zatvoreni i otvoreni prostor na kojima se pružaju usluge obavljanja prometa živežnim namirnicama i drugim proizvodima, te uređivanje i održavanje ovih prostora;
- d) **održavanje javnih parking prostora i javnih garaža**, što podrazumijeva održavanje prostora i objekata u kojima se pružaju usluge parkiranja motornih vozila.

Odluku o povjeravanju obavljanja djelatnosti iz stava 1. ovog člana, donosi Općinsko vijeće na prijedlog zainteresovanog lica.

#### **IV- USLOVI KOJE MORAJU ISPUNJAVATI DAVAOCI KOMUNALNIH USLUGA**

##### **Član 11.**

Svi davaoci komunalnih usluga moraju ispunjavati sljedeće uslove:

- a) da su registrovani za obavljanje komunalne djelatnosti,
- b) da posjeduju odgovarajuću opremu i sredstva za obavljanje komunalne djelatnosti,
- c) da raspoložu određenim stručnim kadrovima koji mogu obezbijediti stalno i kvalitetno obavljanje komunalne djelatnosti,
- d) da obezbijede vršenje komunalne djelatnosti u skladu sa Zakonom o komunalnim djelatnostima,
- e) da cijene komunalnih usluga određuju prema važećim propisima,
- f) da utvrde normative rada i utroška materijalnih sredstava i omoguće kontrolu istih od strane nadležnih organa,
- g) da uspostave tarifni sistem koji će biti osnova za naplatu usluga,
- h) da kontinuirano rade na podizanju nivoa komunalnih usluga i unapređenja komunalnih djelatnosti,
- i) da obezbijede sva prava radnika po osnovu radnog odnosa u skladu sa zakonskim propisima i kolektivnim ugovorom.

#### **V- PRAVA I OBAVEZE DAVAOCA I KORISNIKA KOMUNALNIH USLUGA**

##### **Član 12.**

Davaoci komunalnih usluga iz člana 3. ove Odluke dužni su da obezbijede:

- a) trajno i nesmetano pružanje komunalnih usluga korisnicima usluga na način i pod uslovima propisanim Zakonom o komunalnim djelatnostima, ovom Odlukom i ostalim Odlukama koje uređuju svaku pojedinu oblast komunalne djelatnosti;
- b) ispravnost i funkcionalnost komunalnih objekata i uređaja;
- c) određeni kvalitet komunalnih usluga koje podrazumijevaju zdravstvenu i higijensku ispravnost prema važećim propisima, standardima i normativima, zaštitu okoline i tačnost u pogledu rokova i isporuke, sigurnost korisnika u dobijanju usluga;
- e) razvoj i unapređenje kvaliteta i asortimana komunalnih usluga, kao i unapređenje organizacije rada, efikasnosti i drugih uslova;
- f) red prvenstva u snabdijevanju komunalnih usluga u slučaju više sile, u skladu sa propisom općine Srebrenik;
- g) mjere zaštite i obezbijedenja komunalnih objekata, održavanje građevinskih i drugih objekata, postrojenja i opreme koji služe za obavljanje komunalnih djelatnosti.

### **Član 13.**

Davalac komunalne usluge dužan je u sredstvima javnog informisanja ili na drugi pogodan način obavijestiti korisnike usluga o planiranim ili očekivanim smetnjama i prekidima koji će nastati ili mogu nastati u pružanju komunalnih usluga najkasnije jedan dan prije očekivanog prekida u pružanju tih usluga.

### **Član 14.**

U slučaju nastupanja neplaniranog ili neočekivanog poremećaja ili prekida u pružanju komunalnih usluga, odnosno obavljanja komunalnih djelatnosti, davalac komunalne usluge dužan je odmah o tome na adekvatan način obavijestiti Općinsku službu nadležnu za komunalne poslove i istovremeno preduzeti mjere za otklanjanje uzroka poremećaja i za obezbijeđenje pružanja usluga.

Po prijemu ovog obavještenja, Općinska služba nadležna za komunalne poslove dužna je odmah da:

- a) odredi red prvenstva i način pružanja usluga onim korisnicima kod kojih bi uslijed prekida nastala opasnost po život i rad građana ili rad pravnih i fizičkih lica ili bi nastala nenadoknativa šteta;
- b) naredi mjere za hitnu zaštitu komunalnih objekata i druge imovine koja je ugrožena;
- c) preduzme mjere za hitno otklanjanje nastalih posljedica i druge potrebne mjere za obavljanje komunalnih djelatnosti;
- d) utvrdi razloge i eventualnu odgovornost za poremećaj, odnosno prekid vršenja djelatnosti i učinjenu štetu.

### **Član 15.**

Davalac komunalne usluge ne može uskratiti komunalnu uslugu, osim u slučaju ako korisnik:

- a) izvrši priključenje na komunalnu mrežu bez prethodno pribavljenog odobrenja;
- b) koristi uslugu protivno propisima ili ugovoru;
- c) neosnovano ometa druge korisnike usluga;
- d) ne plati iskorištenu komunalnu uslugu u ugovorenom roku;
- e) nenamjenski koristi komunalnu uslugu u vrijeme otežanog snabdijevanja, odnosno u vrijeme redukcije, o čemu je korisnik komunalne usluge blagovremeno obaviješten.

Po prestanku razloga za uskraćivanje komunalne usluge, davalac komunalne usluge dužan je da, na zahtjev korisnika komunalne usluge, najkasnije u roku od tri (3) dana od dana podnošenja zahtjeva i plaćenih stvarnih troškova za ponovno uključenje, nastavi pružanje komunalne usluge.

Korisnik komunalne usluge ne može otkazati korištenje komunalne usluge, ako to tehničke mogućnosti ne dozvoljavaju, odnosno, ako bi time ugrozio kvalitet korištenja i standard drugih korisnika komunalne usluge i ako bi se time negativno uticalo na okoliš.

### **Član 16.**

Davalac i korisnik komunalne usluge dužni su usaglasiti prije početka korištenja usluge sve elemente pružanja određene komunalne usluge (prava i obaveze, te druga pitanja) i o tome zaključiti Ugovor.

### **Član 17.**

Vlasnik ili korisnik nekretnina dužan je omogućiti davaocu komunalne usluge intervenciju na izgrađenoj komunalnoj infrastrukturi i postrojenjima uz obavezu davaoca komunalne usluge da nadoknadi ili otkloni posljedice izvršene intervencije.

Davalac komunalne usluge dužan je u roku od sedam (7) dana otkloniti posljedice izvršene intervencije.

Zabranjuje se neovlaštenim licima bilo kakva intervencija na komunalnoj infrastrukturi i postrojenjima.

## **VI- SREDSTVA ZA OBAVLJANJE KOMUNALNIH DJELATNOSTI**

### **Član 18.**

Sredstva za obavljanje komunalnih djelatnosti iz člana 2. ove Odluke, obezbjeđuju se iz:

- cijene komunalne usluge,
- iz komunalne naknade,
- iz Budžeta općine i
- drugih izvora po posebnim propisima.

### **Član 19.**

Iz cijene komunalne usluge obezbjeđuju se sredstva za obavljanje sljedećih komunalnih djelatnosti:

- a) snabdijevanje pitkom vodom;
- b) odvođenje i prečišćavanje otpadnih voda, osim odvođenja oborinskih voda;
- c) obavljanje javnog prevoza putnika;
- d) obavljanje dimnjačarskih poslova;
- e) snabdijevanje toplotnom energijom;
- f) održavanje čistoće u dijelu koji se odnosi na skupljanje i odvoz komunalnog otpada na deponiju;
- g) odlaganje komunalnog otpada;
- h) održavanje javnih parking prostora i garaža;
- i) obavljanje pogrebne djelatnosti;
- j) tržnice i pijace.

### **Član 20.**

Iz komunalne naknade obezbjeđuju se sredstva za obavljanje sljedećih komunalnih djelatnosti:

- a) odvođenje i prečišćavanje otpadnih voda u dijelu koji se odnosi na odvođenje oborinskih voda u dijelu čije finansiranje nije obezbijedeno na način utvrđen posebnim propisom;
- b) održavanje čistoće, u dijelu koji se odnosi na čišćenje i pranje javnih površina, uklanjanje snijega i poledice sa javnih površina;
- c) održavanje javnih površina u dijelu čije finansiranje nije obezbijedeno na način utvrđen drugim propisom;
- d) održavanje grobalja u dijelu koji nije obuhvaćen naknadom za rezervisano, odnosno zauzeto zemljište;
- e) održavanje (uključujući utrošak električne energije) javne rasvjete u dijelu čije finansiranje nije obezbijedeno na način utvrđen posebnim propisom;
- f) obavljanje kafilerijskih poslova;
- g) dekorisanje.

## **VII - KOMUNALNA NAKNADA**

### **Član 21.**

Obveznik plaćanja komunalne naknade, u naseljima sa uređenim građevinskim zemljištem je vlasnik stambenog objekata, proizvodnog i poslovnog prostora, garažnog prostora, građevinskog zemljišta koje služi u svrhu obavljanja proizvodne i poslovne djelatnosti, te neizgrađenog građevinskog zemljišta, ili korisnik kada je to ugovorom vlasnik prenio na korisnika.

Neizgrađenim građevinskim zemljištem smatra se zemljište na kojem nije izgrađena nikakva građevina ili na kojem postoji privremena građevina za čiju izgradnju nije potrebno odobrenje za gradnju, kao i zemljište na kojem se nalaze ostaci nekadašnje građevine.

Naseljima sa uređenim građevinskim zemljištem, u smislu stava 1. ovog člana, smatraju se naselja opremljena najmanje pristupnom cestom, objektima za snabdijevanje električnom energijom i snabdijevanje vodom prema mjesnim prilikama.

Izuzetno, Općinsko vijeće može posebnim aktom osloboditi obaveze plaćanja komunalne naknade za područja u kojima nije organizovano pružanje komunalnih usluga.

### Član 22.

Komunalna naknada određuje se za stambeni, proizvodni i poslovni prostor prema jedinici mjere izgrađene korisne površine (m<sup>2</sup>), a za otvoreni prostor, skladišta-stovarišta, pijace i za drugi otvoreni prostor koji neposredno služi za obavljanje djelatnosti, kao i za neizgrađeno građevinsko zemljište prema jedinici mjere (m<sup>2</sup>) građevinskog zemljišta.

### Član 23.

Komunalna naknada utvrđuje se po jedinici mjere na osnovu broja bodova i u zavisnosti od zone građevinskog zemljišta u kojoj se objekat nalazi.

### Član 24.

Pripadnost zoni u smislu ove Odluke definiše se na sljedeći način:

- a) Prva zona obuhvata I i II zonu gradskog građevinskog zemljišta;
- b) Druga zona obuhvata III i IV zonu gradskog građevinskog zemljišta;
- c) Treća zona obuhvata V i VI zonu gradskog građevinskog zemljišta;
- d) Četvrta zona obuhvata prigradska naselja Sofići, NN kod II OŠ, Čojlučko polje, Čehaje, Rapatnica-Sječe, NN Kiseljak, Babunovići i NN Luka;
- e) Peta zona obuhvata sekundarne centre Špionica Centar, Sladna (naselja Ahmići, Kovačevići i Pirage), Duboki Potok, Podorašje-Centar MZ do kraja Drapnića;
- f) Šesta zona obuhvata sva ostala naseljena mjesta na području općine Srebrenik, odnosno ostala građevinska zemljišta koja nisu u granicama prethodnih zona.

Granice obuhvata zona iz prethodnog stava detaljno su utvrđene Odlukom o građevinskom zemljištu općine Srebrenik ("Sl. glasnik općine Srebrenik", broj: 06/07).

### Član 25.

Visina komunalne naknade utvrđuje se prema sljedećoj formuli:

$A = V_b \times K_p \times B$ , gdje je

A - mjesečni iznos komunalne naknade u konvertibilnim markama,

$V_b$  - vrijednost obračunske jedinice "boda" po m<sup>2</sup>, u konvertibilnim markama,

$K_p$  - korisna površina objekta, površina zemljišta koje neposredno služi za obavljanje proizvodnje i pružanje usluga, te površina građevinskog zemljišta, odnosno površina neizgrađenog građevinskog zemljišta,

B - broj bodova zavisno od pripadajuće zone.

### Član 26.

Broj bodova (B) za izračunavanje komunalne naknade po zonama za stambeni, proizvodni i poslovni prostor, garažni prostor i vikend objekte, neizgrađeno građevinsko zemljište, te građevinsko zemljište za obavljanje poslovne djelatnosti, određuje se i iznosi:

r/b	Zona	Stambeni prostor	Proizvodni prostor	Poslovni Prostor	Garažni prostor i vikend objekti	Neizgrađeno građevinsko zemljište	Građevinsko zemljište za obavljanje poslovne dj.
1.	I zona	28	56	84	14	1,4	8,4
2.	II zona	20	40	60	10	1	6,0
3.	III zona	13	20	32	6,5	0,65	3,2
4.	IV zona	8	12	20	4	0,4	2,0
5.	V zona	4	6	10	2	0,2	1,0
6.	VI zona	2	3	5	1	0,1	0,5

#### **Član 27.**

Plaćanja komunalne naknade oslobođeni su:

- javne ustanove,
- objekti socijalne i dječije zaštite,
- humanitarne organizacije,
- objekti vjerskih zajednica koji služe obavljanju vjerskih obreda,
- druge organizacije, ustanove i institucije koje se finansiraju iz budžeta,
- primaoci stalne socijalne pomoći,
- porodice šehida i poginulih boraca, kao i RVI sa i preko 50 % invalidnosti.

#### **Član 28.**

Vrijednost boda komunalne naknade utvrđuje Općinsko vijeće na osnovu Programa finansiranja komunalnih djelatnosti, posebnom odlukom koju donosi najkasnije do 31. decembra tekuće godine za narednu godinu.

Ako se vrijednost boda komunalne naknade ne utvrdi do roka iz prethodnog stava, visina komunalne naknade ostaje nepromijenjena.

#### **Član 29.**

Obaveza i način plaćanja komunalne naknade za svakog pojedinog obveznika utvrđuje se rješenjem kojeg donosi općinska služba nadležna za komunalne poslove.

Obaveza plaćanja komunalne naknade se utvrđuje mjesečno, a obračunava za period od 12 mjeseci, sa mogućnošću plaćanja komunalne naknade kvartalno.

O žalbi protiv rješenja iz stava 1. ovog člana u drugom stepenu rješava Ministarstvo prostornog uređenja i zaštite okolice.

### **VIII- NADZOR**

#### **Član 30.**

Nadzor nad sprovođenjem odredaba ove Odluke vrši općinska služba nadležna za komunalne poslove.

Inspeksijski nadzor nad provođenjem odredaba ove Odluke vrši općinska komunalna inspekcija.

### **IX- ZAVRŠNE I PRELAZNE ODREDBE**

#### **Član 31.**

Nadležne općinske službe su dužne u roku od 1 godine, od dana stupanja na snagu ove odluke, izmijeniti i dopuniti općinske akte iz komunalne djelatnosti u skladu sa odredbama ove Odluke.

Primjena obračuna i naplate komunalne naknade odlaže se do potpunog ustrojavanja evidencije svih obveznika komunalne naknade od strane Službe, s krajnjim rokom početka primjene 01.01.2014. godine.

#### **Član 32.**

Odluka stupa na snagu osmog dana od dana objavljivanja u Službenom glasniku općine Srebrenik.

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINA SREBRENİK  
- Općinsko vijeće -

PREDSJEDAVAJUĆI  
OPĆINSKOG VIJEĆA

Prim. dr. Ibrahim Zukić, s. r.

Broj: 01-873/11  
Srebrenik, 08.12.2011. godine